

**Eqqumiitsuliortut eqqumiitsuliornikkut suliaqartillutik akissarsiaasa B-Indkomstitut tigusinnaalersillugit periarfissaqalernissaat pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasorta q Aqqalu C. Jerimiassen, Atassut)

**Akissuteqaat**

(Aningaasaqarnermut Akileraartarnermullu Naalakkersuisoq)

**Siullermeerinnineq**

Nunatsinni pikkorissorpassuarnik eqqumiitsuliortoqarpugut. Taakku inuiaqatigiitsinnik ilusilersueqataallutillu kulturikkut inuunermut assigiinngisitaartumut pisuumullu ilapittuisuupput. Eqqumiitsuliortortatta tapersersornissaat Naalakkersuisut soorunami kissaatigaat.

Eqqumiitsuliortut namminersorlutik inuussutissarsiuteqartutulli allaatut akileraarutinut tunngatillugu inatsisitigut assigiimmik sinaakkuteqarnissaat, siunnersuuteqartup siunnersuumminut tunngavilersuutigaa, taamaalilluni nipilersortartut akileraarutinut akiliinissartik sioqqullugu, nammineerlutik nalunaarsukkaminni nipilersuutiminnik ilanngaassisinnaassallutik. Taamaalilluni siunnersuut tunngaviusumik paasinerluinermik aallaaveqarpoq, eqqumiitsuliortummi inatsimmi atuuttumi taamatut pisinnaatitaaffeqaareerlutillu periarfissaqareerput. Naalakkersuisut siusinersukkut periarfissamut tassunga tunngatillugu siunnersuuteqartoq ilisimatereerpaat, ilaatigut § 37 naapertorlugu apeqqummut nr. 103 2021-meersumut akissutikkut.

Inatsit atuuttoq eqqumiitsuliortunik, tassani nipilersortartuni, innuttaasunut allanut naligiissitsivoq. Akileraartartut nammineerluni nalunaarsuiffik nassiukkaanni, inuussutissarsiornikkut aningaasartuutit ilanngaatigineqarnissaannut periarfissaqarpoq. Tamanna akileraartartunut tamanut atuuppoq. Inuussutissarsiummut atatillugu aningaasartuutit ilanngaatigineqarsinnaanerannut pisinnaatitaaffik assigiinngitsumik atuutsinneqanngilaq. Taamaammatt eqqumiitsuliortunut immikkut malittarisassiussinissaq pisariaqartinneqanngilaq. Taakku allat assigalugit akileraarusiisarnikkut ilanngaateqarnissamut assigiinnik periarfissaqareerput.

Eqqumiitsuliortut namminersorlutik inuussutissarsiortut allat assigalugit inuussutissarsiornikkut B-nik isertitaqarsinnaapput kiisalu allanik A-tut isertitaqarsinnaallutik. Assersuutigalugu nipilersorfik nipilersortartumut aningaasarsiarititanit akileraarummik ilanngaalluni akileraarummik A-mik akiliisussaavoq. Naak nipilersorfigisap A-mut akileraarut nipilersortartup isertitaanit ilanngaatigalugulu akileraluaraa, taamaattoq nipilersortartoq nipilersornermut tassunga attuumasunik aningaasartuutinik ilanngaateqarsinnaaneranut assigiimmik periarfissaqarpoq.

Malittarisassat atuuttut akileraarusersueriaatsimi pingaarnertut periutsitsinnut, pilerfimmit akileraarusiinemik taaneqartartumut naapertuupput. Pilerfimmit akileraarusiineq isertitanik tiguisumut akileraarutitik akiliinermi allaffissornikkut annertuumik pisariillisaasuvoq, A-nummi akileraarutaagallartunut ilanngaallunilu akiliuteqarnissamut pisussaaffik, aningaasanik akiliisumiippoq. Tassa assersuutigalugu sulisitsisoq aaqqissuisorluunniit. Isertitat amerlanerit A-tut suliarineqartartillugit, tamanna allaffissornikkut innuttaasunut kalluarneqartunut pisortallu ingerlatsiviannut ajornannginnerulertarpoq.

Naalackersuisut nuna tamakkerlugu aningaasarsiaqartunut tusindinut, tassani akissarsinerminni aamma A-mik akileraarummut ilanngaanneqartartunut tatiginnipput. Tamatumani pilerfimmit akileraarusiinemik aaqqissuineq, ataasiakkaat akileraarutitik akiliillutik tamarmik immikkoorlutik naatsorsuuteqarnissaannit aqukkuminarneruvoq.

Eqqumiitsuliortut nipilersortartullu periuseq aalajangersimasoq malillugu nammineerlutik nalunaarsuinerminni eqqumiitsuliornikkut ingerlatsinermit isertitat pineqartillugit, isertitatut A-tut nalunaarutigineqartumik B-tut isertitanngorlugu allannguisinnaapput. Taamaalilluni malittarisassat atuuttut naapertorlugit kiisalu Akileraartarnermut Aqutsisoqarfiup allaffissornerani eqqumiitsuliortup eqqumiitsuliornermik ingerlatsinermini akissarsiaminik isertitatut B-tut nalunaarutiginninnissamut periarfissaqareerpoq.

UPA 2022/129-mi aalajangerneqartutut, akileraartarnermik aaqqissusseqqinnermik suliaqarnermut atatillugu nipilersortartut aallullugit misissuinissamik ingerlatsisoqarnissaa Naalackersuisut tapersorsorpaat. Taamaammat Naalackersuisut sinnerlugit suleqatigiissitamik tassanga siunnerfeqartumik pilersitsisoqareerpoq. Tassunga ilanngullugu ilaatigut nipilersortartut tunngaviumik ajornartorsiutaat, taakkulu annertussusaat qulaajaaviginarlugu, peqatigiiffiit attuumassuteqartut aggersarneqarput. Ilinniartitaanermut, Kultureqarnermut, Timersornermut Ilageeqarnermullu Naalackersuisoqarfik kiisalu Aningaasaqarnermut Naalackersuisoqarfik Akileraartarnermullu Aqutsisoqarfik suleqatigiissitami aamma peqataapput. Suleqatigissitap tullianik ataatsimiinnissaa maanna piareersarneqarpoq.

Tamatuma peqatigisaanik Akileraartarnermut Aqutsisoqarfik eqqumiitsuliortut akileraaruserneqartarnerannut ilitsersuummik suliaqarpoq. Taanna eqqumiitsuliornermik inuussutissarsiuteqartut attuumassuteqartut oqaloqatiginerisa malitsigisaattut suliarineqarpoq, ullorlu 22. marts 2024 tamanut saqqummiunneqarluni.<sup>1</sup>

Siunnersuuteqartoq inatsisit atuunnerannik atuutereersumik kissaateqarmat, siunnersuutip akuerineqarnissaa Naalackersuisut inassutiginnigilaat.

---

<sup>1</sup> Ilitsersuut uani nanineqarsinnaavoq: [https://aka.gl/nyheder/2024/03/musikervejledning?sc\\_lang=da](https://aka.gl/nyheder/2024/03/musikervejledning?sc_lang=da)